



Huduma Inayosukumwa na Upendo

Somo la Juma Hili:

2 Kor. 1:3–14, 2 Kor. 2:17, 2 Kor. 4:2, 1 Kor. 16:5–7, 2 Kor. 7:5–13, 2 Kor. 2:5–17.

FUNGU LA KUKARIRI:

“Maana katika dhiki nyingi na taabu ya moyo niliwaandikia na machozi mengi; si kwamba mhuzunishwe, bali mpate kujua upendo wangu nilio nao kwenu jinsi ulivyo mwingi” (2 Wakorintho 2:4).

Mtume Paulo daima alikuwa na maisha yenye taabu na changamoto nyingi. Pamoja na kifungo na hali zilizohatarisha maisha alizozikabili, pia aliandika hivi: “Kwa Wayahudi mara tano nalipata mapigo arobaini kasoro moja. Mara tatu nalipigwa kwa bakora; mara moja nalipigwa kwa mawe; mara tatu nalivunjikiwa jahazi; kuchwa kucha nimepata kukaa kilindini; katika kusafiri mara nyingi; hatari za mito; hatari za wanyang’anyi; hatari kwa taifa langu; hatari kwa mataifa mengine; hatari za mjini; hatari za jangwani; hatari za baharini; hatari kwa ndugu za uongo; katika taabu na masumbufu; katika kukesha mara nyingi; katika njaa na kiu; katika kufunga mara nyingi; katika baridi na kuwa uchi. Baghairi ya mambo ya nje, yako yanijiayo kila siku, ndiyo maangalizi ya makanisa yote” (2 Kor. 11:24–28).

Tunachokiona katika nyaraka zake kwa Wakorintho ni “kujishughulisha sana” kwake kwa ajili ya kanisa hili. Hata hivyo, kati ya hayo yote, upendo wake kwao haukupungua, kama vile upendo wa Kristo kwetu hautupungui kamwe. Kwa kweli, Paulo alijifunza kutoka kwa Yesu kuyapenda makanisa kwa namna inayoakisi upendo wa Yesu kwetu (2 Kor. 5:14; tazama 1 Kor. 11:1).

***Jifunze somo la juma hili kwa maandalizi ya Sabato ya Agosti 28.**

Shukrani

SOMA

2 Wakorintho 1:3–7. Je, nini sababu ya mtazamo wa shukrani wa Paulo hapa?

Shukrani ya Paulo inasisitiza juu ya faraja ambayo Mungu hutoa kwa wale wanaoteseka. Katika kifungu hiki, kitenzi kufariji (*parakaleō*) na nomino faraja (*paraklēsis*) vinatokea pamoja mara kumi. Hili linawakilisha theluthi moja ya matukio yote ya maneno haya katika 2 Wakorintho (mara 29). Mungu anaelezewa kama “Baba wa rehema, Mungu wa faraja yote; atufarijiye katika dhiki zetu zote” (2 Kor. 1:3, 4).

Faraja anayopokea mtu kutoka kwa Mungu si ya kukaa nayo wenyewe (2 Kor. 1:4, 5). Ni moyo tu ulioteseka na kupokea faraja ya Mungu ndiyo unaoweza kuwapa faraja wale walio katika mateso pia.

Paulo angeweza kuwafariji wengine kwa sababu yeye mwenyewe, katika mateso yake, alipokea faraja kutoka kwa Mungu. “Lakini ikiwa sisi tu katika dhiki, ni kwa ajili ya faraja yenu na wokovu wenu; au ikiwa twafarijiwa, ni kwa ajili ya faraja yenu...” (2 Kor. 1:6). Huu ni upendo!

Paulo anaonesha shukrani kwa ajili ya nini katika 2 Wakorintho 1:8–11?

Paulo anazungumza kuhusu dhiki “ya kwamba tulilemewa mno kuliko nguvu zetu” iliyomfanya yeye na watendakazi wenzake kuogopa kwamba mwisho ulikuwa umewafikia (2 Kor. 1:8). Kwa muda, walifikiri ufufuo ndiyo tumaini lao pekee. Hata hivyo, Mungu aliwaokoa na hali ikabadilika (2 Kor. 1:10). Kutokana na hofu ya kifo (2 Kor. 1:8), wanainuka na kuwa na tumaini kamili kwamba Mungu angewaokoa kwa mara nyingine tena (2 Kor. 1:10). Ushindi wa Mungu wakati uliopita unatupa uhakika kwamba atafanya vivyo hivyo wakati ujao. Mungu hutumia taabu kutufundisha kumtumaini Yeye. Magumu yanaweza kutuongoza kwenye ukomavu wa kiroho, angalau kwa kadiri ambayo tunayaruhusu yatusogeze karibu na Mungu zaidi. Shukrani za Paulo pia zinaonesha nguvu ya maombi ya maombezi na shukrani tunayokuwa nayo kwa sababu ya ukombozi wa Mungu (2 Kor. 1:11).

Ni jambo gani lenye msaada umepata katika kushughulika na wanaoteseka ambalo, kwa njia moja au nyingine, sisi sote tunayakabili?

Utakatifu na Weupe wa Moyo

Jana, tulijifunza kwamba upendo wa Paulo kwa Wakorintho ulidhihirishwa kwa kuwa aliwafariji katika dhiki zao, kama vile alivyopokea faraja kutoka kwa Mungu (1 Kor. 1:1–11). Leo, tutaona kwamba upendo wake kwao ulioneshwa pia kwa njia ya uadilifu ambao yeye na watendakazi wenzake walionesha kwa washiriki wa kanisa huko Korintho.

◦ SOMA

2 Wakorintho 1:12–14 katika mwanga wa 2 Wakorintho 2:17 na 2 Wakorintho 4:2. Unyofu wa Paulo unafunuaaje upendo wake kwa Wakorintho?

Wakorintho wa Pili 1:12–14 inaanzisha hoja ambayo Paulo ataiendeleza katika sehemu iliyobaki ya waraka. Uadilifu wake na utume wake vimetiliwa shaka na watu fulani huko Korintho. Walifikiri kwamba Paulo alikuwa na tabia ya kutokuwa na msimamo na kutokuwa na uamuzi, ambayo haikufaa kwa huduma ya kiutume. Kwa kujibu, Paulo anasisitiza kwamba yeye na wenzake waliwatendea kwa uadilifu mkubwa.

Maneno mawili yanaelezea mwenendo wa Paulo na washirika wake: utakatifu na weupe wa moyo (2 Kor. 1:12). Kirai “weupe wa moyo” kinatokana na neno la Kigiriki *haplotēs*. Kinatumika hapa kueleza uadilifu binafsi katika usemi au tabia; kwa ufupi, kinadhihirisha dhamiri safi (Efe. 6:5, Kol. 3:22). Kwa upande mwingine, neno “unyofu” (kutokana na neno la Kiyunani *eilikrineia*) pia linaelekeza katika uadilifu na dhamiri safi.

Wakorintho hawakupaswa kutilia shaka uwazi wa nia ya Paulo. Anaweka wazi kwamba utakatifu na weupe wa moyo wake asili yake ni Mungu. Wazo hili limeelezewa vyema katika Biblia toleo la *New English Translation*, inayotaja “dhamiri yetu ya kwamba kwa utakatifu na weupe wa moyo utokao kwa Mungu” (2 Kor. 1:12, msisitizo umeongezwa). Katika aya hiyo hiyo, Paulo anadai zaidi kwamba sifa hizi za huduma tunapatiwa “kwa neema ya Mungu.”

Inaonekana wapinzani wa Paulo walitafsiri vibaya maneno yake, katika mawasiliano yaliyotangulia kuandikwa (2 Kor. 1:13, 14). Paulo anahakikisha kwamba makusudi yake yalikuwa wazi na ya kueleweka. Alikuwa na hakika kwamba unyofu wa maneno, makusudi na matendo yake ungewekwa wazi “katika siku ile ya Bwana wetu Yesu” (2 Kor. 1:14).

Uzoefu wako mwenyewe umekuwaje kuhusu nia au makusudi yako, hata iwe njema na ya dhati kiasi gani, kutiliwa shaka au kupingwa? Hilo linapaswa kukuambia nini kuhusu jinsi unavyopaswa kuwa mwangalifu unapohoji makusudi ya mtu mwingine?

Kubadilisha Mipango kwa Ajili ya Upendo

Tuliona kwamba baadhi ya watu huko Korintho walitilia shaka nia na upendo wa Paulo. Leo, tutaangalia sababu moja mahususi: mipango yake ya kusafiri inayobadilika (2 Kor. 1:15–2:4).

SOMA

tena 1 Wakorintho 13:4–7. Kwa nini Paulo anataja sifa hasi badala ya sifa chanya tu za upendo?

Paulo alikuwa Korintho hapo kabla. Kwa mujibu wa 1 Wakorintho 16:5, 6, alipanga kupitia Makedonia akiwa njiani kurudi Korintho na, huenda, kukaa Korintho kwa kipindi cha majira ya baridi. Kutoka Korintho, angeenda Uyahudi na sadaka iliyokusanywa Makedonia kwa ajili ya maskini walioko Yerusalemu. Hata hivyo, alibadili mipango yake kwa sababu ya taarifa mbaya iliyoletwa na Timotheo kutoka Korintho (1 Kor. 4:17, 1 Kor. 16:10, 2 Kor. 1:1).

Paulo alikusudia kwenda Korintho moja kwa moja kutoka Efeso na huko kushughulikia masuala yaliyoripotiwa na Timotheo. Mpango mpya wa safari ungekuwa Efeso—Korintho—Makedonia—Korintho—Uyahudi (2 Kor. 1:15, 16). Alitoka Efeso kwenda Korintho, lakini hatimaye akarudi Efeso. Mipango yake ilibadilika. Hakurudi Korintho kama alivyopanga, angalau si mara moja, kwa sababu ziara yake ya mwisho haikuenda vizuri. Kwa hiyo, alirudi Efeso na kuwaandikia badala yake. Angependelea kutuma barua kuliko kuhatarisha kufanya mambo yawe mabaya zaidi kwa ziara nyingine (2 Kor. 2:1, 3).

Makusudi ya Paulo katika ziara ya mwisho yalieleweka vibaya. Baadhi ya watu huko Korintho walisema kwamba hakuwa mtu wa kuaminika na kwamba hakuwapenda vya kutosha (2 Kor. 1:17). Kwa kujibu kwake shutuma hizo, alielekeza macho ya Wakorintho katika injili ya Kristo. Alikuwa mwaminifu kwa nia yake ya kuwatembelea Wakorintho katika fursa iliyo bora zaidi, kama vile Mungu alivyokuwa mwaminifu katika kutimiza ahadi Zake kwao kwa njia ya Kristo (2 Kor. 1:18–22).

“Maana ahadi zote za Mungu zilizopo katika yeye ni Ndiyo; tena kwa hiyo katika yeye ni Amin; Mungu apate kutukuzwa kwa sisi” (2 Kor. 1:20).

Kwa hivyo, jibu lake halikuwa mchanganyiko wa kutatanisha wa “ndiyo” au “hapana” kutegemeana na mazingira, kama walivyosema, lakini lilikuwa “ndiyo daima,” kama vile kazi ya Mungu katika Kristo ni “Ndiyo” (2 Kor. 1:19).

Kwa hiyo, sababu ya Paulo kuandika waraka kwa Wakorintho badala ya kuwatembelea ilikuwa ni upendo wake wa dhati kwao, si kinyume chake (2 Kor. 2:4). Ziara nyingine mara tu baada ya ziara hiyo yenye kuhuzunisha ingewaleta maumivu zaidi, si furaha ambayo alikusudia kuleta kwa kuwapo kwake (2 Kor. 1:24, 2 Kor. 2:3). Nia yake njema ilitafsiriwa vibaya kwa urahisi kiasi gani.

Msamaha na Uthibitisho wa Upendo

Badala ya kuwatembelea Wakorintho mara ya pili, Paulo, baada ya kurudi Efeso, alituma kile kilichojulikana kama “waraka mkali” (tazama 2 Kor. 2:3, 4; 2 Kor. 7:8, 12).

SOMA

2 Wakorintho 7:5–13. Matokeo ya kile alichowaandikia yalikuwa nini, na Paulo aliitikiaje kwa sababu ya matokeo hayo?

Paulo na Tito walikutana baadaye huko Makedonia, ambako Paulo alisikia kutoka kwa Tito habari njema kwamba maneno yake yenye nguvu yalileta na matokeo chanya, jambo lililofanya moyo wa mtume ujae furaha. Ikiwa hapo kabla, baadhi ya watu huko Korintho walisimama kinyume cha Paulo, sasa kanisa lilikuwa upande wake. Ni muhimu kiasi gani kuwaunga mkono viongozi wetu. Kama washiriki wa kanisa, tunaweza kufanya kazi yao iwe rahisi zaidi kuliko ilivyo.

SOMA

2 Wakorintho 2:5–11. Wazo kuu hapa ni lipi?

Kifungu hiki kinahusiana na suala la nidhamu ya kanisa. Wanazuoni wanajadiliana iwapo mkosaji hapa ni mtu yule aliyefanya kosa la kujamiana kwa maharimu katika 1 Wakorintho 5:1–5 au mtu mwingine kabisa, mtu ambaye aliwashawishi wengine katika kanisa katika shutuma zao kwamba Paulo hakuwa thabiti katika mwenendo wake na hakuwajali katika uamuzi wake wa kusafiri. Muktadha unaonekana kupendelea chaguo la pili. Kwa vyovyote vile, fundisho muhimu zaidi la kifungu hiki linahusu jinsi kanisa linavyopaswa kushughulika na mtu aliyetenda dhambi.

Kifungu hiki kinafundisha kwamba kusudi la nidhamu ya kanisa ni urejeshaji kwa njia ya msamaha na kwa njia ya uthibitisho wa upendo kwa mwenye dhambi (2 Kor. 2:6–8, 10). Kifungu pia kinadokeza kwamba nidhamu ya kanisa inaweza kuwa yenye kuhuzunisha, lakini ni muhimu. Yaani, hata kama wanaweza kuwa na nia njema, na kutaka kuwa na mwelekeo wa “neema,” baadhi ya makanisa huenda yasikabili au kushughulikia dhambi iliyo wazi au hata ya hadharani. Kwa upande mwingine, wengine wanaweza kuwa wagumu sana kubadilika, wasiosamehe, na wakali. Dhambi inapaswa kushughulikiwa, lakini kwa upendo. Hivyo, Paulo angeweza kulihimiza kanisa kuthibitisha upendo wake kwa mkosaji (2 Kor. 2:8) kwa sababu yeye mwenyewe alilipenda kanisa (2 Kor. 2:4)!

Kanisa la Korintho lingeweza kumpenda mkosaji (2 Kor. 2:8) kwa sababu lilikuwa lenyewe mpokeaji wa upendo wa Mungu kupitia upendo wa Paulo. Hili linatufundisha nini kuhusu upendo?

Ushindi katika Kristo

SOMA

2 Wakorintho 2:12, 13. Paulo alienda wapi baada ya kuwaandikia “waraka mkali”? Alifanya nini huko?

Moyo wa Paulo haukuwa na utulivu/raha alipokuwa akimngojea Tito (2 Kor. 7:5, 6). Licha ya kukosa utulivu huko, hakuweza kuacha kuzungumza habari za Yesu (2 Kor. 2:12). Alimpenda Yesu sana. Wakati huo, bado hakujuua matokeo ya waraka wake. Alikuwa na shauku ya kumwona Tito na kusikia kuhusu mwitikio wa Wakorintho.

Kazi ya Paulo huko Troa ilifanikiwa, lakini “hakuweza kubaki huko kwa muda mrefu. ‘Kuyachunga makanisa yote’ na hasa kanisa la Korintho lilikuwa jukumu lililokuwa limeuelemea sana moyo wake. Alikuwa akitarajia kukutana na Tito kule Troa na kusikia kutoka kwake maneno ya ushauri na maonyo aliyokuwa ameyapeleka kwa ndugu waliokuwa Korintho yalivyokuwa yamepokelewa, jambo hili lilikuwa likimlelea na kumwumiza sana moyoni, akiandika juu ya uzoefu huu, Paulo anasema, “Sikuweza kutulia moyoni mwangu, kwa kuwa sikuonana na Tito ndugu yangu.” Kwa hiyo, aliamua kuondoka Troa na kuvuka kuelekea Makedonia na huko alikutana na Timotheo mjini Filipi.”—Ellen G. White, *Matendo ya Mitume*, sehemu ya pili, uk. 17.

SOMA

2 Wakorintho 2:14–17. Paulo aliitikiaje alipokutana na Tito huko Makedonia na kusikia kuhusu mwitikio chanya wa Wakorintho?

Katika mlipuko wa furaha, Paulo anathibitisha kwamba Mungu “anatushangiliza daima katika Kristo” (2 Kor. 2:14). Ni kauli ya ajabu iliyoje! Moyo uliojaa kuwepo kwa Kristo unadhihirisha “harufu ya kumjua yeye kila mahali” (2 Kor. 2:14).

Paulo anafurahi katika Kristo kwa sababu waraka wake uliojaa uchungu ulizaa matunda aliyokusudia kuvuna (2 Kor. 7:5–9). Huu ni ushindi mkubwa. Wakati huo huo, katika 2 Wakorintho 2:17, Paulo anathibitisha uaminifu wake kama mtume wa Kristo (2 Kor. 2:17, 2 Kor. 1:12). Kwa mujibu wa kifungu hiki, kinachomtofautisha mtumishi mwaminifu wa Kristo na mhudumu wa uongo ni kwamba wakati huyo wa pili anaeneza injili kwa masilahi yake binafsi, wa kwanza huhubiri Neno la Mungu kwa kumpenda Kristo kwa moyo wote.

Ni kitu gani kinakupa motisha katika yote uyafanyayo, hasa unapoyafanya kwa jina la Yesu?

JIFUNZE ZAIDI

“Ujumbe Wazingatiwa,” uk. 17–27, katika *Matendo ya Mitume*, sehemu ya pili.

“Wale ambao wamebeba huzuni kubwa zaidi mara nyingi ndio wale wanaopeleka faraja kubwa zaidi kwa wengine, wakipeleka nuru popote waendako. Watu kama hao wamenidhamishwa na kufanywa kuwa wema kwa taabu zao; hawakupoteza imani kwa Mungu wakati matatizo yalipowapata, lakini walishikilia upendo Wake wenye kulinda. Watu kama hao ni uthibitisho hai wa utunzaji mwema wa Mungu.” —Ellen G. White, *God’s Amazing Grace*, uk. 122.

“Maisha ya Kikristo yaliyowekwa wakfu daima yanaangaza nuru, faraja na amani. Yana sifa ya usafi, busara, unyofu, na manufaa. Yanatawaliwa na upendo huo usio na ubinafsi unaotakasa mvuto. Yamejaa Kristo, na huacha alama ya nuru popote aendako aliye na huo upendo.” — *God’s Amazing Grace*, uk. 122.

“Mtume Paulo aliona kuwa ni lazima kukemea makosa katika kanisa, lakini hakushindwa kujizuia katika kukemea kosa. Anaeleza kwa shauku sababu ya tendo lake. Alifanya kwa uangalifu kiasi gani ili kuacha mvuto kwamba alikuwa rafiki wa wakosaji! Aliwafanya waelewe kwamba ilimgharimu maumivu kuwapa maumivu. Aliacha mvuto akilini mwao kwamba maslahi yake yalifungamana na yao.—Ellen G. White Comments, in *The SDA Bible Commentary*, gombo la 6, uk. 1094.

MASWALI YA KUJADILI

1. Katika 2 Wakorintho 2:1–14, Paulo anathibitisha uadilifu wake katika huduma. Kwa nini sifa hii ya huduma ni muhimu sana?
2. Ukweli kwamba Paulo alibadilisha mpango wake wa safari unatuambia nini kuhusu uhitaji wa kuwa na uwezo wa kubadilisha mipango katika huduma ya Kikristo? Kwa nini ni muhimu kuwa tayari kubadilika inapohitajika?
3. Paulo alikabili maumivu makali na wasiwasi katika huduma yake. Hili linaonesha wazi kwamba viongozi wa kanisa ni wanadamu ambao wanakabiliwa na mateso kama watu wengine wowote. Washiriki wa kanisa wanaweza kufanya nini ili kurahisisha kazi yao?
4. Paulo anarejelea wahaka wake (2 Kor. 2:13) kabla tu ya kutaja ushindi wake katika Kristo (2 Kor. 2:14). Angewezaje kuzungumzia udhaifu na nguvu zake kwa wakati mmoja? Tunawezaje?